

28 AUG 2001

Megawati-Pulang

MEGAWATI BERLEPAS PULANG KE INDONESIA

KUALA LUMPUR, 28 Ogos (Bernama) -- Presiden Indonesia Megawati Soekarnoputri hari ini berlepas pulang ke Indonesia setelah menamatkan lawatan dua hari ke negara ini.

Pesawat yang membawa presiden itu berlepas dari Lapangan Terbang Antarabangsa KL (KLIA), Sepang pukul 1.30 tengah hari.

Malaysia adalah negara terakhir dalam kunjungan Megawati selama lapan hari ke sembilan negara anggota Asean untuk mengukuhkan hubungan antara Indonesia dengan negara-negara itu.

Megawati yang tiba di sini dari Singapura semalam diiringi suaminya Taufiq Kiemas, Menteri Luar Indonesia Dr Hassan Wirajuda serta 60 anggota degelasi.

Semalam Megawati mengadakan pertemuan dengan Perdana Menteri Datuk Seri Dr Mahathir Mohamad apabila kedua-dua negara melahirkan persetujuan supaya kerjasama badan dan agensi keselamatan di kedua-dua negara ditingkatkan bagi menangani masalah keganasan dan kegiatan pelampau.

Megawati turut diraikan oleh Yang di-Pertuan Agong Sultan Salahuddin Abdul Aziz Shah dan Raja Permaisuri Agong Tuanku Siti Aishah pada majlis makan malam di Istana Negara malam tadi.

Pagi ini Megawati mengadakan pertemuan dengan rakyat Indonesia yang berada di Malaysia di Kedutaan Indonesia di sini.

Turut berada di lapangan terbang untuk mengucapkan selamat jalan ialah Menteri Luar Datuk Seri Syed Hamid Albar dan Menteri Perpaduan Negara Dan Pembangunan Masyarakat Datuk Dr Siti Zaharah Sulaiman selaku menteri pengiring.

-- BERNAMA

RZS KHY NMO